

n Nij Laid moaken is nog zo makkelk nait...

■ GRUNNEN – Der binnen bie Grunneger Toal nog mor acht inzendens binnen komen veur de wedstried van t Mollebone-festival. Al verwachten ze wel, dat der op ain juni (den mout tekst en meziek binnen wezen) zo'n vieftien wezen zellen. Doar mouten Jur Eckhardt, Jan J. Boer en Klaas Staal den veur 10 en 11 november de beste oetzuiken.

t Vaalt, ducht mie, ook nait tou wat te moaken, dat eerlieks n pries weerd is. Dat kon k nog weer ais heuren bie t Noord-Nederlands liedjesfestival, veurege weke hollen in Kefee 1672 in Stad. Doar wuir ook nij Grunnens moakwaark zongen, maist over dingen, woar je gaauw succes mit hebben kinnen. Nait om veur op stoulpunte zitten te goan.

Riemen op vrouger en mit goudkope sentimenten is makkelk. Benoam as ploats, dij bezongen wodt, der nait zoveul tou dut. Dat gevuil kreeg ik bie t luustern noar teksten over n Daam (*Mien olle Damster toren, ik bin hier ja geboren*) en over Delfziel. Doar kon k dou zo mor variaties op moaken: *Hier druig ik ais de jongeskiel, in die, mien mooi Delfziel. Doarom hol k ook zo veul van die, mor nait zo van dien industrie. Dij was der vrouger ook nait bie...*

Koom ie van t Hammerk, den

MOLLEBONE
G grunneger
Laid MUSIC 

kin k joe vot ook bedainen: *Zai ik Nijwolle's brogge, den zai k mien jeugd terogge. In t Hammerk en bie t Dok von ik mien jong geldk. n Poar kilometer wieder: Goan mien gedachten noar Termunten, den roak ik vot mien waike punten... Wil ie d aaner kaante op? Ook gain probleem: Kiek ik in t Slochter bad in t wotter, den zai k mie-zulfen ik genotter, in t spaigeln van dien glad gekabbel, van mien oppervlakkege gebabbel.*

Ie maggen wel aannemen, dat de pries goanzel noar t Mollebone-laid, dat in ainmoal òfrekent mit aal dij olle strosnieders: *Der is (as k zingen wil) ain ding, dat k zeker wait: boer gaat nou nait meer noar noaber tou, pestoor zet tannen zulf mor in zien kou, noar berre huifst doe, Ernst mien jong, nait meer en, sniederke, baarg ook mor op dien scheer: op de Molleboonse Meulenbaarg bluit nou t nije laid.*

Ik wens joe staarkte mit t riemen en dichten veur dij (voor nait te stoere) Mollebone-mit-zinger. Want dat mout t netuurlijk worden: n mit-zinger. k Heur t wel in novembermoand in de Meulenbaarg...